



Број/Број: 03-/4-50-1-10-17-23/08
Сарајево/Сарајево: 20. 12. 2008.godine

IZVJEŠTAJ O RADU ZAJEDNIČKE KOMISIJE ZA EVROPSKE INTEGRACIJE ZA 2008. GODINU

1. Uvodne napomene

Nadležnosti Zajedničke komisije za evropske integracije PSBiH (u daljem tekstu: Zajednička komisija) regulirane su članom 57. Poslovnika Predstavničkog doma i članom 51. Poslovnika Doma naroda.

Zadaci Zajedničke komisije su da:

- raspravlja o općim pitanjima koja se odnose na evropske integracije;
- prati izvršavanje prava i obaveza BiH proizašlih iz međunarodnih ugovora koji se odnose na Vijeće Evrope;
- koordinira rad matičnih tijela u vezi s evropskim integracijama i dostavlja im mišljenja, preporuke i upozorenja;
- analizira posljedice integracione strategije po BiH i priprema sveobuhvatne izvještaje;
- nadgleda i prati provođenje obaveza iz Sporazuma o stabilizaciji i pridruživanju, pretprijetne i pristupne strategije BiH;
- nadgleda usklađivanje zakona BiH s pravnom tečevinom EU (acquis communautaire);
- saraduje s institucijama EU, BiH (posebno s Direkcijom za evropske integracije), i drugih zemalja u vezi s pitanjima integracija i obavlja druge poslove vezane za evropska pitanja koja ne spadaju u djelokrug ostalih radnih tijela;
- održavanje javnog saslušanja u vezi s pitanjima evropskih integracija radi prikupljanja mišljenja i stavova predstavnika civilnog društva, nevladinih organizacija, intelektualaca, kao i vladinih i nevladinih eksperata u određenim oblastima.

Zajednička komisija je u ovom sazivu Parlamentarne skupštine BiH konstituirana na 1. sjednici, održanoj 21.3.2007., izborom predsjedavajućeg, te prvog i drugog zamjenika predsjedavajućeg. Zajednička komisija ima 12 članova, po šest iz oba doma.

Članovi Zajedničke komisije su: Halid Genjac, predsjedavajući, Ivo Miro Jović, prvi zamjenik predsjedavajućeg; Drago Ljubičić, drugi zamjenik predsjedavajućeg, Zoran Koprivica, Hilmo Neimarlija, Milica Marković, Alma Čolo, Azra Hadžiahmetović, Branko Dokić, Selim Bešliagić, Šemsudin Mehmedović i Rudo Vidović.

Komisija se bavila sljedećim pitanjima i aktivnostima koje su joj propisane poslovnica oba doma:

U periodu od 1. 1. 2008. do 30. 12. 2008. održano je 10 sjednica Zajedničke komisije.

2. AKTIVNOSTI KOMISIJE

Kao tematske tačke dnevnog reda, Zajednička komisija razmatrala je:

- Informacija o pretpristupnim (IPA) fondovima koji su na raspolaganju Bosni i Hercegovini;

Izlaganje – Zara Halilović, direktor za koordinaciju pomoći EU u Direkciji za evropske integracije,

- Informacije o dokumentima: „Ažurirano partnerstvo“, „Sporazum o stabilizaciji i pridruživanju“, „Mapa puta – liberalizacija viznog režima“;

Izlaganje – Osman Topčagić, direktor Direkcije za evropske integracije,

- Informacija o napretku reforme javne uprave u Bosni i Hercegovini;

Izlaganje – Suad Musić, zamjenik državnog koordinatora za reformu javne uprave,

- Analiza ispunjavanja prioriteta iz Sporazuma o stabilizaciji i pridruživanju i Evropskog partnerstva;

Izlaganje – predstavnici Direkcije za evropske integracije,

- Prezentacija redovnog godišnjeg Izvještaja o napretku u procesu evropskih integracija za 2008. godinu;

Izlaganje – Dimitris Kurkulas, šef Delegacije Evropske komisije u BiH,

- TAIEX kao instrument pomoći u procesu usklađivanja zakonodavstva;
Izlaganje – Amela Alihodžić, pomoćnik direktora Direkcije za evropske integracije,

- Informacija o korištenju IPA fondova;

Izlaganje – Zara Halilović, DEI

- Informacija o TWINNING projektima;

Izlaganje – Zara Halilović, DEI.

3. SJEDNICE ZAJEDNIČKE KOMISIJE

8. SJEDNICA održana je 17. 1. 2008. Sjednici su prisustvovali svi članovi Zajedničke komisije, osim Azre Hadžiahmetović, Ive Mire Jovića i Milice Marković, koji su opravdano odsustvovali. Na dnevnom redu bilo je razmatranje Plana rada Zajedničke komisije za 2008. godinu.

9. SJEDNICA održana je 1. 2. 2008. Nakon što je usvojen Izvještaj o radu za 2007. godinu, raspravljalo se o pripremi Zajedničke komisije za 10. interparlamentarni sastanak s Delegacijom Evropskog parlamenta za odnose sa zemljama Jugoistočne Evrope. Na dnevnom redu bilo je i razmatranje Prijedloga rezolucije o ubrzavanju procesa pristupanja Bosne i Hercegovine u članstvo Evropske unije, predlažaći: poslanici SDP-a Denis Bećirović, Selim Bešliagić, Jozo Križanović, Zlatko Lagumdžija, Mirjana Malić i Sefer Halilović, poslanik BPS-a. Azra Hadžiahmetović i Hilmo Neimarlija opravdano su odsustvovali.

10. SJEDNICA održana je 5. 2. 2008. Ponovo je razmatran Prijedlog rezolucije o ubrzavanju procesa pristupanja Bosne i Hercegovine u članstvo Evropske unije.

Nakon rasprave, Zajednička komisija zauzela je stav da se Prijedlog rezolucije prosljedi domovima Parlamentarne skupštine BiH na razmatranje i izjašnjavanje. Azra Hadžiahmetović, Milica Marković i Hilmo Neimarlija opravdano su odsustvovali.

11. SJEDNICA održana je 22. 4. 2008. Na dnevnom redu bilo je izlaganje predstavnika Direkcije za evropske integracije o pretpripravnim fondovima EU koji su na raspolaganju Bosni i Hercegovini. Branko Dokić, Hilmo Neimarlija i Alma Čolo opravdano su odsustvovali.

12. SJEDNICA održana je 3. 6. 2008. Na dnevnom redu bile su informacije o sljedećim dokumentima: „Ažurirano partnerstvo“, „Sporazum o stabilizaciji i pridruživanju“, „Mapa puta – liberalizacija viznog režima“. Na ovoj sjednici Zajednička komisija razmatrala je Inicijativu poslanika Huseina Nanića, kojom se Vijeće ministara BiH zadužuje da pripremi i Parlamentarnoj skupštini BiH dostavi Informaciju o spremnosti institucija BiH za preuzimanje obaveza u vezi s primjenom Sporazuma o stabilizaciji i pridruživanju. Nakon rasprave,

Zajednička komisija jednoglasno je usvojila sljedeći *Zaključak*: Komisija podržava i predlaže Predstavničkom domu i Domu naroda da usvoje Inicijativu kojom se zadužuje Vijeće ministra BiH da pripremi i Parlamentarnoj skupštini BiH dostavi Informaciju o spremnosti institucija BiH za preuzimanje obaveza u vezi s primjenom Sporazuma o stabilizaciji i pridruživanju, u najkraćem roku, a najkasnije za 45 dana. Alma Čolo, Branko Dokić i Hilmo Neimarlija opravdano su odsustvovali.

13. SJEDNICA održana je 3. 7. 2008. Na dnevnom redu bila je Informacija o napretku reforme javne uprave. Na ovoj sjednici Zajednička komisija izjašnjavala se o Prijedlogu rezolucije o osudi komunističkih režima, predlagача poslanika Momčila Novakovića. Alma Čolo, Azra Hadžiahmetović, Milica Marković i Branko Dokić opravdano su odsustvovali.

14. SJEDNICA održana je 8. 9. 2008. Na dnevnom redu bilo je razmatranje i usaglašavanje konačnog prijedloga zaključaka predloženih na 10. zajedničkoj sjednici Doma naroda i Predstavničkog doma povodom rasprave o sadržaju Sporazuma o stabilizaciji i pridruživanju. Na dnevnom redu bila je i analiza prioriteta iz Sporazuma o stabilizaciji i pridruživanju i Evropskog partnerstva za 2008. godinu. Azra Hadžiahmetović, Rudo Vidović i Branko Dokić opravdano su odsustvovali.

15. SJEDNICA održana je 23. 9. 2008. Na dnevnom redu bilo je razmatranje Prijedloga zakona o izmjeni Zakona o klasifikaciji djelatnosti u BiH radi davanja mišljenja o principima predloženog zakona. Azra Hadžiahmetović, Ivo Miro Jović, Selim Bešlić i Milica Marković opravdano su odsustvovali.

16. SJEDNICA održana je 4. 11. 2008. Na dnevnom redu bila je rasprava o Prijedlogu zakona o izmjeni Zakona o klasifikaciji djelatnosti u BiH, druga faza u nadležnoj komisiji. Azra Hadžiahmetović, Rudo Vidović, Alma Čolo, Milica Marković i Branko Dokić opravdano su odsustvovali.

17. SJEDNICA održana je 6. 11. 2008. Na dnevnom redu bila je prezentacija redovnog godišnjeg Izvještaja o napretku BiH u procesu evropskih integracija za 2008. godinu. Zoran Koprivica i Branko Dokić opravdano su odsustvovali.

18. SJEDNICA održana je 23. 12. 2008. Na dnevnom redu bile su informacije o TAIEX-u kao instrumentu pomoći u procesu usklađivanja zakonodavstva, IPA fondovima i njihovom korištenju, te Informacija o TWINNING projektima u BiH. Na sjednici je predstavljen i dnevni red za 11. IPM sastanak koji će biti održan u Briselu 21. i 22. januara 2009. Dogovoren je i sastanak članova Zajedničke komisije s ministrom vanjskih poslova Luksemburga Jeanom Asselbornom, za 13. januar 2009.

4. MEĐUNARODNE AKTIVNOSTI KOMISIJE

10. interparlamentarni sastanak s Delegacijom Evropskog parlamenta

Zajednička komisija za evropske integracije organizirala je redovni godišnji sastanak s Delegacijom Evropskog parlamenta za odnose sa zemljama Jugoistočne Evrope 4. i 5.

februara 2008. godine u Sarajevu. Sastanku su, osim članova Zajedničke komisije i članova Delegacije Evropskog parlamenta za odnose sa zemljama Jugoistočne Evrope, kojom predsjedava Doris Pak, prisustvovali i: visoki predstavnik i specijalni predstavnik EU Miroslav Lajčak, šef Delegacije Evropske komisije Dimitris Kurkulas, Andreas Ster, državni sekretar, predstavnik predsjedavajućeg Vijeća EU, ambasador Slovenije u BiH Nataša Vodušek i direktor DEI-a Osman Topčagić.

Na dnevnom redu bile su sljedeće teme: reforma policije, ustavna reforma, rad pravosuđa i borba protiv korupcije, uspostavljanje jedinstvenog ekonomskog prostora, IPA fondovi namijenjeni Bosni i Hercegovini i regionalna saradnja.

Na kraju 10. interparlamentarnog sastanka usvojena je Zajednička izjava predsjedavajućih dvije delegacije.

Članovi Zajedničke komisije prisustvovali su određenom broju seminara, te studijskih posjeta, navedenih u nastavku:

- Seminar OSCE – Program jačanja zakonodavne vlasti o temi: Lisabonska strategija EU i njen doprinos konkurentnosti; Procesi donošenja odluka u Evropskoj uniji; Proširenje EU i zemlje Zapadnog Balkana; Proces stabilizacije i pridruživanja BiH; Pristup fondovima EU: Instrument za pretpristupnu pomoć (IPA). Seminar je održan 14. i 15 februara 2008., u zgradi Parlamentarne skupštine BiH.
- Studijska posjeta Nacionalnom savjetu Slovačke Republike u organizaciji NDI-a. Zajedničku komisiju predstavljala je poslanik Azra Hadžiahmetović, a parlamentarno osoblje šef Odjela za kadrovska pitanja Samir Buljina i saradnik u Zajedničkoj komisiji Vladana Lučić.
Na ovom studijskom putovanju razmatrane su sljedeće teme: uloga parlamenta u procesu evropskih integracija; zakonodavne promjene i ustavni amandmani; uloga komisija za evropske integracije; strana pomoć pri ulasku u Evropsku uniju; parlamentarno istraživanje i uloga parlamentarnog instituta.
- Seminar OSCE-a – Program jačanja zakonodavne vlasti- Regionalni seminar za osoblje u zaposleno u komisijama za evropske integracije parlamenata zemalja Zapadnog Balkana.

U okviru međunarodnih aktivnosti, članovi Zajedničke komisije imali sljedeće sastanke i razgovore:

- Sastanak članova Komisije s delegacijom Parlamenta Švedske i ambasadorom Kraljevine Švedske N.J. E. Larsom Erikom Wingrenom;
- Sastanak članova Komisije s parlamentarnom grupom za BiH u Bundestagu;

- Sastanak članova Komisije s Odborom za sigurnost i odbranu Skupštine Republike Crne Gore;
- Sastanak predsjedavajućeg Komisije za evropske integracije PSBiH s predsjednikom Odbora za evropske integracije Skupštine Srbije.

Sastanci s nevladinim i međunarodnim organizacijama:

- Sastanak s predstavnicima Evropskog pokreta u BiH;
- Sastanak s predstavnicima Misije OSCE-a u BiH;
- Sastanak s predstavnicima OHR-a;
- Sastanak s predstavnicima ACIPS-a;
- Sastanak s predstavnicima Instituta za evropsku politiku iz Republike Češke.

Bilateralni susreti i posjete Zajedničke komisije za evropske integracije:

Radna posjeta Zajedničke komisije za evropske integracije Odboru za evropske integracije Hrvatskog sabora realizirana je od 11. do 13. maja 2008. u saradnji s OSCE-ovim Programom jačanja zakonodavne vlasti, s kojim Zajednička komisija za evropske integracije kontinuirano i uspješno saradjuje.

Tokom posjete Hrvatskom saboru, članovi Zajedničke komisije susreli su se s predsjednikom Odbora za evropske integracije Nevenom Mimicom, predsjednicom Nacionalnog odbora Vesnom Pusić, potpredsjednicom Odbora za vanjsku politiku Marijom Pejčinović-Burić i članovima Odbora i predsjednikom Odbora za međuparlamentarnu saradnju Miloradom Pupovcem.

U Ministarstvu vanjskih poslova i evropskih integracija Hrvatske članovi Zajedničke komisije razgovarali su s državnim sekretarom za evropske integracije Željkom Kuprešakom i njegovim saradnicima.

U toku posjete razgovaralo se o unapređenju parlamentarne saradnje, uzajamnoj pomoći i podršci u procesu euroatlantskih integracija, te o regionalnoj saradnji i stanju u regiji.

Posjeta Parlamentu Baden-Württemberg realizirana je od 28. do 30. maja 2008., na poziv predsjednika Parlamenta Petera Stauba. U bh.delegaciji bili su članovi Komisije za evropske integracije i Komisije za ekonomske reforme i razvoj. Delegacija je prisustvovala i manifestaciji „Dani Bosne i Hercegovine“ u okviru koje je održana prezentacija o mogućnostima investiranja, saradnje i poslovanja u BiH. Ovu manifestaciju organizirao je Generalni konzulat BiH u Štutgartu zajedno s IHK (Industrijskom i trgovačkom komorom regije Štutgart).

Posjeta Odboru za evropske poslove Državnog zbora Slovenije realizirana je od 30. 6. do 1.7. 2008. Predsjedavajući Zajedničke komisije Halid Genjac, zamjenik predsjedavajućeg Ivo Miro Jović i Zoran Koprivica, član Komisije, boravili su jednodnevnoj radnoj posjeti Odboru za

evropske poslove Državnog zbora Slovenije, na poziv Antona Kokalja, predsjedavajućeg Odbora. Na sastanku je razgovarano o jačanju evropske perspektive zemalja Zapadnog Balkana, što je bio jedan od prioriteta slovenačkog predsjedavanja EU, unapređenju parlamentarne saradnje Slovenije i BiH, kao i konkretnoj pomoći Odbora za evropske poslove Zajedničkoj komisiji za evropske integracije.

Rezime

Na osnovu navedenih aktivnosti, može se konstatirati da je Zajednička komisija u okviru svojih nadležnosti propisanih poslovnica, kao i Planom rada, u izvještajnom periodu, uspješno realizirala većinu postavljenih zadataka. Treba imati u vidu da je realizacija određenih aktivnosti kasnila, ili da one nisu mogle biti realizirane, iz objektivnih razloga, i to isključivo zbog neophodnog usklađivanja s aktivnostima drugih relevantnih institucija. Važno je naglasiti da je Zajednička komisija uspješno realizirala i određene aktivnosti koje nisu bile uvrštene u Plan rada ali su zbog njihove važnosti razmatrane.

Zajednička komisija ukazuje na nedostatak adekvatnog prostora za svoj rad.

Zajednička komisija će u narednom periodu kontinuirano nastaviti raditi na praćenju, analizi i nadgledanju aktivnosti svih relevantnih institucija u procesu pridruživanja EU, te realizirati aktivnosti obuhvaćene Planom rada.

Predsjedavajući
Zajedničke komisije

Halid Genjac